

Na osnovu člana 13. stav 1. tačka e) i člana 18. tačka b) Ustava Kantona Sarajevo ("Službene novine Kantona Sarajevo", br. 1/96, 2/96-ispravka, 3/96 – ispravka, 16/97, 14/00, 4/01, 28/04 i 6/13), Skupština Kantona Sarajevo, na sjednici održanoj 29.04.2013. godine, **donijela je**

Z A K O N

O PRAVIMA LICA KOJA SE IZ KANTONA SARAJEVO VRAĆAJU U MJESTA PRIJERATNOG PREBIVALIŠTA

I - OSNOVNE ODREDBE

Član 1. **(Predmet zakona)**

Ovim zakonom uređuju se: lica koja imaju prava po ovom zakonu, oblasti u kojima se ostvaruju prava, pravni okvir, prava iz oblasti socijalne zaštite i zaštite porodice sa djecom, boračko invalidske zaštite i zdravstvene zaštite, organi koji vode postupak, postupak ostvarivanja prava, finansiranje, nadzor nad provođenjem ovog zakona i druga pitanja od značaja za ostvarivanje prava.

Član 2. **(Lica koja mogu ostvariti prava)**

- (1) Prava iz ovog zakona mogu ostvariti lica:
 - a) koja su se dobrovoljno vratila i prijavila prebivalište u mjesto prijeratnog prebivališta u Republiku Srpsku i Brčko Distrikt Bosne i Hercegovine i koja su imala boravište u Kantonu Sarajevo po osnovu statusa raseljenog lica ili
 - b) koja su se dobrovoljno vratila i prijavila prebivalište u mjesto prijeratnog prebivališta u Republiku Srpsku i Brčko Distrikt Bosne i Hercegovine i koja su imala prebivalište u Kantonu Sarajevo kojem je predhodio status reseljenog lica.
- (2) Pod prijeratnim prebivalištem iz stava (1) ovog člana, a u smislu ovog zakona, smatra se prebivalište do 30.04.1991. godine.
- (3) Lica iz stava (1) ovog člana ostvaruju prava u skladu sa ovim zakonom ukoliko su prije stupanja na snagu ovog zakona imala boravište odnosno prebivalište u Kantonu Sarajevo iz stava (1) tač. a) i b) ovog člana i pod uslovom da ista prava ne ostvaruju u mjestu prijeratnog prebivališta.

II - OBLASTI U KOJIMA SE OSTVARUJU PRAVA

Član 3. **(Pravni okvir ostvarivanja prava)**

- (1) Prava iz oblasti socijalne zaštite i zaštite porodice sa djecom ostvaruju se u skladu sa Zakonom o osnovama socijalne zaštite, zaštite civilnih žrtava rata i zaštite porodice sa djecom („Službene novine Federacije Bosne i Hercegovine“, br. 36/09, 54/04, 39/06 i 14/09), (u daljnjem tekstu: Federalni zakon), Zakonom o socijalnoj zaštiti, zaštiti civilnih žrtava rata i zaštiti porodice sa djecom („Službene novine Kantona Sarajevo“, br. 16/02, 8/03, 2/06, 21/06, 17/10, 26/12 i 15/13), (u daljnjem tekstu: Zakon o socijalnoj zaštiti) i Uredbom o regulisanju troškova dženaze/sahrane/ukopa („Službene novine Kantona Sarajevo“, broj: 14/06), (u daljnjem tekstu: Uredba).

- (2) Prava iz oblasti boračko – invalidske zaštite ostvaruju se u skladu sa Zakonom o dopunskim pravima boraca – branitelja Bosne i Hercegovine („Službene novine Kantona Sarajevo“, broj: 45/12 – Prečišćeni tekst) (u daljnjem tekstu: Zakon o pravima boraca).
- (3) Prava iz oblasti zdravstvene zaštite ostvaruju se u skladu sa Zakonom o zdravstvenoj zaštiti („Službene novine Federacije Bosne i Hercegovine“, br. 46/10) i Odlukom o proširenom obimu prava na korištenje ortopedskih pomagala, lijekova, medicinsko – sanitetskih sprava i materijala za ratne vojne invalide sa područja Kantona Sarajevo („Službene novine Kantona Sarajevo“, broj: 13/04 i 11/06).

III - SOCIJALNA ZAŠTITA I ZAŠTITA PORODICE SA DJECOM

Član 4.

(Prava iz socijalne zaštite i zaštite porodice sa djecom i organi koji vode postupak)

- (1) Lica iz člana 2. ovog zakona, u skladu sa uslovima i načinom ostvarivanja prava iz oblasti socijalne zaštite i zaštite porodice sa djecom, koji su uređeni Federalnim zakonom, Zakonom o socijalnoj zaštiti i Uredbom, imaju slijedeća prava:
 - a) stalna novčana pomoć,
 - b) dodatak za njegu i pomoć od drugog lica za lica sa invaliditetom koji je nastao nakon 65. godine života,
 - c) novčana naknada za pomoć i njegu od strane drugog lica za stara i nemoćna lica,
 - d) jednokratna novčana pomoć,
 - e) izuzetna novčana pomoć,
 - f) smještaj u ustanovu socijalne zaštite,
 - g) smještaj u drugu porodicu,
 - h) dodatak na djecu,
 - i) naknada umjesto plaće ženi-majci u radnom odnosu, za vrijeme dok odsustvuje sa posla radi trudnoće, porođaja i njege djeteta,
 - j) novčana pomoć za vrijeme trudnoće i porođaja žene – majke koja nije u radnom odnosu,
 - k) jednokratna pomoć za opremu novorođenog djeteta,
 - l) pomoć u prehrani djeteta do 6 mjeseci i dodatna ishrana za majku dojilju,
 - m) zdravstvena zaštita za lica koja to pravo nisu ostvarila po drugom osnovu i to:
 - 1) korisnici stalne novčane pomoći
 - 2) djeca od rođenja do polaska u školu
 - 3) lica starija od 65 godina života
 - 4) lica sa invaliditetom
 - 5) lica u stanju socijalne potrebe
 - n) troškovi dženaze/sahrane/ukopa.
- (2) O priznavanju prava iz stava (1) ovog člana u prvom stepenu odlučuju:
 - a) pod tač. a), b), c), d), e), f), g), m) al. 1) i 4) i tačkom n) JU „Kantonalni centar za socijalni rad“,
 - b) pod tač. h), i), j), k), l), m) al. 2), 3) i 5) općinski načelnik.
- (3) Mjesna nadležnost prvostepenih organa iz stava (2) ovog člana određuje se prema mjestu posljednjeg boravišta ili posljednjeg prebivališta u Kantonu Sarajevo lica iz člana 2. ovog zakona.
- (4) U drugostepenom postupku o pravima iz stava (1) ovog člana odlučuje Ministarstvo za rad, socijalnu politiku, raseljena lica i izbjeglice Kantona Sarajevo.

IV - BORAČKO-INVALIDSKA ZAŠTITA

Član 5.

(Prava iz boračko – invalidske zaštite i organi koji vode postupak)

- (1) Lica iz člana 2. ovog zakona, u skladu sa uslovima i načinom ostvarivanja prava iz oblasti boračko – invalidske zaštite koji su uređeni Zakonom o pravima boraca imaju slijedeća prava:
 - a) banjsko i klimatsko liječenje (medicinska rehabilitacija),
 - b) naknada putnih troškova i troškova za liječenje u inostranstvu,
 - c) prvenstvo upisa u obrazovne ustanove i besplatno školovanje,
 - d) stipendiranje,
 - e) dodjela sredstava za održivi povratak,
 - f) naknada troškova dženaze-sahrane,
 - g) podizanje nišana-nadgrobnog spomenika,
 - h) mjesečna novčana primanja,
 - i) na besplatne obavezne udžbenike za redovno školovanje, školski pribor i užinu,
 - j) prednost pri smještaju u đačke i studentske domove,
 - k) jednokratne novčane pomoći,
 - l) pravo dobitnika ratnih priznanja ili odlikovanja na obavještanje o smrti putem medija, organiziranje ukopa-sahrane uz državne počasti i pravo na ukupno mjesto na lokacijama zaslužnih ličnosti,
 - m) na obezbjeđenje ogrijeva.
- (2) O priznavanju prava iz stava (1) ovog člana u prvom stepenu odlučuju:
 - a) pod tač. a), f) i h) općinska služba za upravu nadlažna za boračko – invalidsku zaštitu,
 - b) pod tač. b), e), j), k) i l) Ministarstvo za boračka pitanja Kantona Sarajevo putem nadležnih komisija,
 - c) pod tač. d) i i) Fond Kantona Sarajevo za školovanje i stipendiranje djece boraca, poginulih boraca i poginulih civila žrtava rata „Ikre“,
 - d) pod tačkom c) nadležna ustanova iz oblasti srednjoškolskog i visokoškolskog obrazovanja u skladu sa Odlukom Vlade Kantona Sarajevo,
 - e) pod tačkom m) kantonalna boračka udruženja iz sastava koordinacije boračkih udruženja Kantona Sarajevo,
 - f) pod tačkom g) Fond Kantona Sarajevo za izgradnju i očuvanje grobalja šehida i poginulih boraca, memorijalnih centara i spomen obilježja žrtava genocida.
- (3) Mjesna nadležnost prvostepenih organa iz stava (2) ovog člana određuje se prema mjestu posljednjeg boravišta ili posljednjeg prebivališta u Kantonu Sarajevo lica iz člana 2. ovog zakona.
- (4) U drugostepenom postupku o pravima iz stava (1) ovog člana odlučuje Ministarstvo za boračka pitanja Kantona Sarajevo

V – ZDRAVSTVENA ZAŠTITA

Član 6.

(Prava iz zdravstvene zaštite)

- (1) Lica iz člana 2. ovog zakona, u skladu sa uslovima i načinom ostvarivanja prava iz oblasti zdravstvene zaštite, koji su uređeni propisima iz člana 3. stav (3) ovog zakona imaju pravo na zdravstvenu zaštitu obuhvaćeno obaveznim zdravstvenim osiguranjem koje podrazumijeva osiguranje zdravstvenog standarda pod jednakim uslovima za osigurana lica u zadovoljavanju potreba u primarnoj, specijalističko – konsultativnoj i bolničkoj zdravstvenoj zaštiti s odgovarajućom medicinskom rehabilitacijom.

VI - POSTUPAK OSTVARIVANJA PRAVA

Član 7. (Podnošenje zahtjeva)

- (1) Zahtjev za ostvarivanje prava podnosi se nadležnom prvostepenom organu za određenu oblast, a u skladu sa ovim zakonom.
- (2) Podnosilac zahtjeva je dužan uz zahtjev dostaviti:
 - a) prijavu prebivališta u mjesto prijeratnog prebivališta u Republiku Srpsku i Brčko Distrikt Bosne i Hercegovine i
 - b) prijavu boravišta u Kantonu Sarajevo po osnovu statusa raseljenog lica ili
 - c) prijavu prebivališta u Kantonu Sarajevo kojem je prethodio status reseljenog lica.

Član 8. (Postupanje prvostepenog organa po zahtjevu)

- Nadležni prvostepeni organ rješava po zahtjevu iz člana 7. ovog zakona koristeći dokaze:
- a) kojim raspolaže za podnosioc zahtjeva (eventualno postojeći spis predmeta),
 - b) koje pribavlja po službenoj dužnosti,
 - c) koji su po karakteru takvi da ih podnosilac zahtjeva pribavlja lično.

Član 9. (Zabrana ostvarivanja istih prava po drugim propisima)

- (1) Prvostepeni organ će po službenoj dužnosti utvrditi da li lica iz člana 2. ovog zakona ostvaruju ista prava po drugim propisima.
- (2) Lica iz člana 2. ovog zakona koja su ostvarila pravo po ovom zakonu dužna su u roku od 15 dana obavijestiti nadležni organ o svakoj promjeni koja bi mogla uticati na nastavak ostvarivanja stečenih prava.
- (3) Lica iz člana 2. ovog zakona kojim je isplaćeno novčano primanje na koji nisu imala pravo dužna su vratiti primljeni iznos. Ako to ne učine u roku kojeg odredi nadležni prvostepeni organ povrat tog iznosa ostvarit će se tužbom kod nadležnog suda koju pokreće po službenoj dužnosti prvostepeni organ.

Član 10. (Datum početka ostvarivanja prava)

Prava iz ovog zakona pripadaju licima iz člana 2. ovog zakona od prvog dana narednog mjeseca po podnošenju zahtjeva.

Član 11. (Zadržavanje prava)

Lica iz člana 2. ovog zakona koja su ostvarila prava u skladu sa Odlukom o ostvarivanju prava iz osnova socijalne, zdravstvene, boračko – invalidske zaštite povratnika iz Kantona Sarajevo na područje Entiteta Republika Srpska („Službene novine Kantona Sarajevo“ broj: 16/11), stupanjem na snagu ovog zakona zadržavaju ostvarena prava u smislu da se ne mora voditi novi postupak u skladu sa ovim zakonom.

Član 12.
(Propisi o vođenju postupka)

U postupku ostvarivanja prava iz ovog zakona primjenjuje se Zakon o upravnom postupku („Službene novine Federacije Bosne i Hercegovine“, broj: 2/98 i 48/99), izuzev ukoliko je ovim zakonom drugačije propisano.

VII - FINANSIRANJE

Član 13.
(Pozicija sa kojih se vrši finansiranje)

- (1) Prava iz oblasti socijalne zaštite i zaštite porodice sa djecom finansiraju se iz sredstava sa pozicija Ministarstva za rad, socijalnu politiku, raseljena lica i izbjeglice Kantona Sarajevo,
- (2) Prava iz oblasti boračko – invalidske zaštite finansiraju se iz sredstava sa pozicije Ministarstva za boračka pitanja Kantona Sarajevo,
- (3) Prava iz oblasti zdravstvene zaštite finansiraju se iz sredstava sa pozicije Ministarstva zdravstva Kantona Sarajevo.

VIII – NADZOR NAD PRIMJENOM ZAKONA

Član 14.
(Organi koji vrše nadzor)

- (1) Nadzor nad primjenom ovog zakona vrše: Ministarstvo za rad, socijalnu politiku, raseljena lica i izbjeglice Kantona Sarajevo, Ministarstvo za boračka pitanja Kantona Sarajevo i Ministarstvo zdravstva Kantona Sarajevo u skladu sa svojim nadležnostima.
- (2) Inspekcijski nadzor nad primjenom ovog zakona vrši Kantonalna uprava za inspekcijske poslove i Upravna inspekcija Ministarstva pravde i uprave Kantona Sarajevo.

IX – PRELAZNE I ZAVRŠNE ODREDBE

Član 15.
(Prestanak važenja odredbi Odluke)

Stupanjem na snagu ovog zakona prestaje da važi Odluka o ostvarivanju prava iz osnova socijalne, zdravstvene i boračko - invalidske zaštite povratnika iz Kantona Sarajevo na područje Entiteta Republika Srpska („Službene novine Kantona Sarajevo“ broj: 16/11).

Član 16.
(Stupanje na snagu)

Ovaj zakon stupa na snagu prvog narednog dana od dana objave u „Službenim novinama Kantona Sarajevo“.

Broj: 01-02-10640/13

29.04.2013. godine
S A R A J E V O

P R E D S J E D A V A J U Ć A
SKUPŠTINE KANTONA SARAJEVO

Prof. dr Mirjana Malić